

# OLA

PULETINI A'OGA

26 FEPUARI 2018 ~ Lomiga 3 ~ Upega Tafailagi: [www.ola888.com](http://www.ola888.com) ~ Telefoni (03) 382 6674 ~ Tuatusi: [ola.niupac@gmail.com](mailto:ola.niupac@gmail.com); ~ [evaleon.books@gmail.com](mailto:evaleon.books@gmail.com) ~ E le faatauina ~ A Free Publication



## OTOOTOGA:

### Tafefea tupe i le vai

E faitau afe tala sa totogi e fanau Asia mo se a'oga i Aukilani ua tafefea uma i le vai ina ua tapunia. O isi e ta'i \$16,000 na totogi mo le tiploma pisinisi ua taofia nei ina ua soloia e le NZQA le laisene e gaiio ai. O le to'atele o i latou e o mai i Saina ma Initia.

### Toe afua e lavea ai faia'oga

I le fuafuaga a le malo mo se lauliliuga fou, na ta'ua ai e le minisita le sauni e faaleleia le lagolago mo faia'oga. Na afea i lana saunoaga faafitauli e iai le lapopo'a o vasega, le tele o tiute, e aofia ai ma le faatonuga o le amio. Atonu e lavea ane ai ma totogi.

### Leai se tali i le oge

Na folafola foi e le minisita le taua i le malo o le faafitauli o le oge faia'oga, aemaise lava i Aukilani. O loo molimauina le faifo o le numera o i latou e fia galulue i le faiva i tausaga ta'itasi. O le 'afa o faia'oga e galulue i le kolisi e tuua le faiva i totonu o le 5 tausaga.

### Amata a'oga teseri

Ua a'e le kuata muamua o a'oga a iunivesite ma politeki. Na molimau lipoti o faasalalauga i le lolofi atu o fanau i vasega; o le to'atele o loo ua faaoga tatau le ofo a le malo e aooga fua ai mo se tausaga. O se tasi lea ofo ua tino mai a le Leipa i ana folafolaga o le '100 aso'.

### Valaau ia Obama

I le naunau e faaola lana A'oga Siata ua mafua ai le valaau a le ta'ita'i o le Act, David Seymour, i a Barack Obama e susu mai i Niu Sila.



E lei manino mai pe ua talia e le alii peresitene tuai le faatalaauula, ae pe mata foi e sui ai le mafaufau o Hipkins.



TAUTUA A'OGA LELEI: Ropeta Mene-Tulia, Malu Tulia, ma Pauline Luafutu-Simpson, i le taeao o le faafeiloa'i a le UC Pasefika i fanau ulufale o lenei tausaga. Ua malolo ane ina ua uma tiute o le aso. A fua i pasene e 80 tina ae 20 tamā i le faatinoga o le tautua; isi aiga e 100 aato mo tina; molimau lava tamaiti.

## Folafola e le malo se liuga fou o a'oga

Ua folafola e le minisita o A'oga se liuga fou o a'oga a le atunuu e amata mai i le tapulaa faamasani e aulia le teseri.

Na saunoa le minisita, Chris Hipkins, i totonu o le maota e faamatala le fuafuaga tuutuu mamao a le malo.

Ua mana'omia lea ina ia ogatusa faiga o loo faatino ai le faiva ma suiga o le taimi.

I lenei lauliliuga o le a toe asia ai le A'oga Ataeao (Tomorrow's Schools); toe tilotilo i a'oga i le fale mo fanau faato'a faamasani; o le a toe taga'i foi i le tulaga o meatotino a a'oga ma lo latou umia ma tausia; le tulaga i faiva faapitoa ma le tapenaina o talavou mo galuega; ae faapea se iloiloga fou o le su'ega NCEA.

Faaalia e le minisita ua sauni e talanoa ma vaega ta'itasi uma ina ia malosi se tali atu a le malo i mana'oga o le 'autautua (faiaoga ma pulega o a'oga) aemaise matua ma fanau.

Na afea i lana saunoaga le Pasefika ma Maori ma le naunauga o le malo e saili ni tali malolosi mo faafitauli ua loa le feagai ma i latou.



Chris Hipkins, Minisita o A'oga, naunau e sui se alafua mai lena a le National ma lana foi alafua; ae iai ni talanoaga o le a faia i le masina o Me e soalaupule ai ma vaega ta'itasi e tusa i le fuafuaga.

E tolu tausaga o loo ua fuafua e faataoto ai le polokalame; o le faamoemoe ia avea ma ata e mulita'ia i se taimi umi i le lumana'i.

Na faailoa le agaga fiafia i ta'ita'i o iuni a faia'oga e talisapaia le fuafuaga. Saunoa foi se tasi o tamaitai su'esu'e taualoa, Cathy Wylie o le NZER, e viia lea laasaga na ia ta'ua o se 'aga fou'. E lelei mo le fanau.

E manatu Wylie ua fetau le taimi talu ai le tele o ava ua iloa i le A'oga Ataeao, ua tatau ai ona toe afua.

O le a mataitu aga o lenei faamoemoe o le malo; e iai isi ua faailoa lo latou tetee, e aofia ai le Itu Agai.

*Ripoti o le Vaiaso:*

# Ta'utino Leonard ua sauni e amo le satauro

Ina ua faafeiloa'i atu e le pule le faia'oga fou ia Leonard i matua ma uso faia'oga, na viia e ia ona tomai i le taina o le kitara, taaloga, e fiafia i lana aganuu Samoa.

A o tala a isi ana matua ia te ia, ua fiafia ua iai se faia'oga tama mo a latou fanau.

O naunauga ma faamoemoega nei sa faatalitali mai mo le faia'oga fou, e le gata i le pule a o matua foi.

O Leonard Davids, 24, faato'a iu mai i le polokalame tapena a le Iunivesite a Aukilani i le faiva faia'oga, o lana galuega muamua lea.

E ui ua atoa nei le tolu vaiaso o le a'oga ae o loo tauilo pea faatama valevale lona tulaga suia; e le talitonu ua avea ma se faia'oga, o se mea sa naunau i ai.

E fa tausaga na tapena ai mo le faiva, a o lea ua taunuu manuia; o loo faatali le faauuga mo lona tusipasi ia Me, a o lea ua amata ona galue.

O se talanoaga lenei ma le susuga a le faia'oga.

OLA: Lau susuga, na a mai le amataga o lau galuega?

Leonard: O se amataga manuia mo a'u i le tali mai a le pule ma uso faia'oga; ae sili lava le tali mai a la'u vasega.

O le vaiaso muamua ma le lua sa ou taumafai ai e faaali atu a'u ia i latou; ae faapea foi latou ia te a'u. O se vaega o lona le mea o loo ou naunau e fai mo latou, ae faapea le faalogo ma le usitai i le faia'oga. O se amataga lelei tele e pei ona ou ta'ua.

OLA: E a la amio a lau vasega?

Leonard. E lelei nai tamaiti, e faalogo ma naunau foi e fesoasoani i le faia'oga. Ou te faia'oga i le Tausaga 6-8, e fefiloi agavaa ma o loo ma galulue nei ma lo'u fesoasoani e faatulaga i vasega faitau ma su'esu'e; ae taumafai foi e galulue faatasi e mafai ai ona fa'aaoga malosia o i latou e malolosi. E 30 tamaiti o la'u vasega ae leai sa'u faafitauli i le amio.



FAAMASANI: Leonard ma ni tama o lana vasega o loo iloilo pe mata e mamafa

OLA: Faapefea lou fesooota'i atu i le si'osi'omaga lautele?

Leonard: E faapena foi, pei ona ou ta'ua le lagolago a le pulega ia i matou e fou mai i le galuega. E to'atele nai a'u matua ua feiloa'i atu i ai, faailoa lo latou naunau e fesoasoani. E fiafia foi ua iai se faia'oga tama fai mai e mana'omia ni alii se to'atele. Ou te fiafia o loo mana'omia a'u. E le o se a'oga to'atele e mafana le mafutaga a matua ma le a'oga. E faapena foi i totonu o le aiga faia'oga. E maua le fefa'aaloaloa'i.

OLA: Poo e maua le lagolago i le faatinoga o tiute o le galuega?

Leonard: Pei ona ou ta'ua, e iai lo'u fesoasoani, o se faia'oga ua lava foi lona potomasani ua leva ona galue. E naunau foi e faalelei soo se vaega o la'u fe'au. E le fiu foi i le taliina o a'u fesili. E mautu foi meafaigaluega ma alaga'oa e tua i ai le faia'oga ma tamaiti.

OLA: O le a la sau mea ua maua talu ona e amata?

Leonard: E tele naua mea ua ou maua. Ua ou iloa le taua o le taimi e tapena ai. A lelei lau tapenaga i le vaiaso e te le so'ona pisi i le faaiuga o le vaiaso, o se mea lea ua ou faatauaina. E moni e le uma fe'au a le faia'oga ae mafai lava ona pulea lelei pe a iloa

fa'aaoga tatau le taimi.

OLA: O a ni au sini o loo fia ausia?  
Leonard: I le taimi nei, e fia faalelei la'u ta ukulele. Ou te mana'o e iloa fa'aaoga le tele o mea faaili a le a'oga o loo iai."

O Leonard e nofo i le aai a Ranui i Aukilani i Sisifo. Sa a'oga i le Ranui Primary sosoo ai ma Henderson Intermediate ae faaii i Kelston Boys. Na uma le a'oga ua leai se naunauga e fa'aaoua, a ua fia faigaluega. Lua tausaga mulimuli ane ua a'e se lagona fou e toe fa'aaoua le a'e ma ulufale ai i le Best Pacific.

Na te manatua lelei ona faia'oga agalelei sa fai o latou sao i lana sailiga. E iai le susuga ia Peter Forsyth, ma isi.

Mae'a lona ma ulufale loa i le polokalame a le iunivesite o Aukilani; o lea ua ata mai le faamoemoe.

E mautinoa o lona auai i le faiva o se tali fiafia lea mo le a'oga ma matua o loo tatalo mo ni faia'oga Pasefika. Taimi nei o loo feagai Niu Sila ma le oge faia'oga; e mafua i le 'alofia o le faiva ona o le vao mafuaaga.

"O se faamanuiaga mo a'u le fa'aaoga o ni taleni mai le Atua e fesoasoani ai i fanau i totonu o lenei potua'oga," saunoa le faia'oga fou a Glen Eden Primary, Leonard Davids, alala i Ranui, Aukilani Sisifo.



*Faasoa o le Vaiaso:*

# E sui faiga ae tumau faavae



Pauline Luafutu-Simpson

O leni alagaupu a Samoa e talanoa mai i le feluaiga fai fai pea o se aganuu i ona aga, auala poo faiga, ae molimau foi i le tulaga moni, e ui i suiga e feagai ma i tatou i le gasologa o le taimi, ae tumau pea mau faavae ma talitonuga silisili o loo tu ai i luga lona faatinoga.

Peita'i o le mea aupito lata mai ma o se lu'i foi, o le le faigofie ona molimoli atu nei mea silisili faaleaganuu i le isi tupulaga.

I lana saunoaga i luma o se aufono i le 2003 na faaali ai se lagona o Tui Atua e faapea:

*E faapefea ona faamatala le taua o taga e momoli ai le poto faaleaganuu, talitonuga silisili, gagana, faamoe-moe ma miti mai le tasi tupulaga i le isi?*

*E faapefea ona e faamatala i tupulaga lumana'i le aano o le tiute o e matutua i la tatou aganuu, o le tatou aganuu e faavae i le mauaina o le taimi anoa ma aoga i le va o e laiti ma le aumatutua . . (2003:12).*

A o faameo o ia i leni tulaga lavelave, i le taimi e tasi ua ia ofoina mai ni fofo e ala i le sufiina o le au faafofoga e saili avanoa e talanoaina ai ia mataupu taua.

E faasoa ma le autalavou ma sailiili pe ni a ni foliga o nei mea taua i lo latou tino mai i le soifuaga i nei aso.

O le lu'i mo tatou ia mautinoa le tuulima atu o nei mea silisili i a tatou tupulaga o le lumana'i, ma ia talia foi le faaofia o atagalua fou, aga ma auala e molia ai le feau.

O aga nei o se aganuu e ola na saunoa faasino i ai Tui Atua e faapea:

*E mana'omia tele lo tatou saili mo le uiga, le isi uiga, le atalilo e maua ai le aano ma faavae ai faavaa i a tatou talanoaga ma o tatou tuua, i tatou ma isi aganuu. I nei alumaga e tataua ona tatou malamalama o suiga ma le su'iga fefiloi o ni vaega o le olaga. O soo se aganuu ola e le mafai ona faaualoa e le taga poo se faiga e fetuatuana'i ma le faavaa o le olaga faaoneionapo.*

Ua tele lava ni su'esu'ega faa-Pasefika ua lagona ni o latou leo i lea

sailiga mo le uiga, le isi uiga, ma le atalilo.

O Tui Atua Tupua Tamasese, Teresia Teiawa, Manulani Meyer ma Konai Helu-Thaman o i latou nei o sikola Pasefika na latou so'oso'oa tusitusiga faalesu'esu'e ma lo'u mafaufau lo'u fatu ma le agaga.

E maligi loimata pe a faitauina a latou upu pe faalogo i a i latou o saunoa. Latou te so'oa lo'u tuana'i ma lo'u iai iinei i o'u faamoemoega mo le lumana'i.

E toe faafo'i le manatu i tua i o'u matua ma o latou matua sa iai le mau i le poto faaleaganuu ma le 'oa faaleagaga.

O i latou na na togia la'u malaga i le ola a'oa'oina, ma latou faailoa mo a'u ni ava tetele o le a feagai ma la'u fanau laiti pe afai e taumau i le ta'iala e le suia.

O nei ata na ulua'i totoina o loo ua faafelavei mai ma felagia'i faapei o se lauga faatauanau, ma unaia a'u e tuutuu le upega i le loloto.

O iai i latou e lata mai su'esu'ega e pei o Tuagalu (2013), Tuia (2013) ma isi na muamua atu e auai faatasi i le valaau mo auala e faaofia ai a tatou aga faasilisili e iai le alofa, aiga, tautua, ava i tagata matutua, le lotu ma le faamatai.

O i latou e le o ni Samoa atoa foi nisi o a tatou tupulaga lona lua, tolu ma e i lalo ifo, e le 'aumaua le loloto ma le taua tele o nei aga faasilisili se'i vagana ua tilotilo i ai, ma tofo i ai ma a'oina foi.

Ua iloa le felua'iga fai pea i le laufanua o tu ma aga ma gagana i Aotearoa, e fete'ena'i lea ma taofi fetineia'i o loo fesaga'i ma fanau Pasefika; o le iuga o ausiga e faaleatoa.

E mana'omia ni auala e le gata e soo ai le ava lea ae maualafia ai i nisi auala fou e faamatala ai le olaga ma mafaufauga.

O la'u su'esu'ega o le a faaalua ai se tasi faata'ita'iga i le fausaga faa-Pasefika, le faavaagalua ua ta'ua o le Fausiga o le Faletete.

O le a taumafai e saili le malosi o iai i leni faavaa e iloa ai pe aoga e faavae ai suiga.

O loo finau pea le ausu'esu'e a le Pasefika mo le vaai faa-Pasefika i le lauliliuina o taiala a'oga.

A o le fesili pe faapefea ona faataunuu i sona faatinoga, e lei lava sona su'esu'eina.

E taumafai leni su'esu'ega e faatu se finau e faapea e talafeagai le faaofia o le poto faa-Pasefika i taiala a Niu Sila mai lava i le tapulaa amata e aulia le tapulaa teseri.

O leni finau e fesoota'i i su'esu'ega na muamua e iai Chu (2014) ma Airini (2010). E atagia i le leo o le finau, ua te'a le taimi e talanoa ma tusitusi ai pea i nei aafiaga faa-Pasefika.

Mulia'i, i se tali atu i le olega a Tui Atua, o le a taumafai le su'esu'ega e faailoa se aoga o leni faavaa i le molita'iina o aga faasilisili faaleaganuu i a tatou fanau ma tupulaga faia'e o Samoa mo ataeao. O le sini ia iai ni auala fou e saili i ai le paleni i le va o a tatou mea faatauanau ma aga a le talutalufou.

**O se vaega leni o le folasaga a Pauline Luafutu-Simpson o lana su'esu'ega mo le faailoga o le foma'i tofa manino (PHd) o loo ua amataina nei i lalo o le faamalumaluga a le Pacific Studies a le UC (Iunivesite o Kenetaperi).**

**O Pauline o le Faatonu o le tautua a le UC e lagolagoina fanau a'oga Pasefika i totonu o le Iunivesite a Kenetaperi. E alala ma lona aiga i Kalaiesetete. Ae afua mai lona tala i Samoa i Poutasi, Falealili.**


**O upu ma uiga faaaogaina i le folasaga: le isi uiga—nuance; atalilo—metaphor; mea silisili/aga faasilisili - values; aga—approach; taiala—curriculum; su'iga fefiloi—pluralism; teseri—tertiary; faavaa—frame/context; atagalua—model(s); faavaagalua—framework.**

**E maua le atoa o leni faasoa i lona faaupuga faa-Peretania, e pei ona uluai faamau ai. Liliuina e le OLA 2018**

**“mafaufauga o le vaiaso”**

**E gagana le ola. E gagana le oti.**

**Tui Atua Tupua Tamasese**



## 25 FEP—03 MATI

25

1930 Folafofa e Blake le taofia o ni osofaiga i le Mau

1967 Faiga Palota; malo o Fiamē Mataafa

26

1988 Faiga palota Samoa; malo o Tofilau Eti Alesana

2003. Ueligitone. Molia atu se tagi a le Sitiseni Samoa mo le tilofia e le palemene

28

1944 Tuumalo Taisi Nelesoni i lona 61

1963 Tuua Apia e uluai ulu matagaluega mo toleniga faalegaluega I Niu Sila: Lafo Tuiletufuga, Leupepe Vase, Leuo Tuioti. Dr Fanaafi Maiai, Su'a Collins, Tala Finau Mailei, Makario Solia, Maulalo Tugaga, Kaiona Falevi

Petana, Tua Hansell, Charles Pritchard, Arthur Young, Mailo Saipele, Carl Winterstein, Tapeni Faaiuas.

01 MATI

1900 Sisi le fu'a a Siamani; avea Samoa ma kolone a Siamani

1938 Aso Fanau Tui Atua Tupua Tamasese Efi

1949 Sir Guy Powles Komesina Sili Niu Sila i Samoa

02

1971 Taunuu i Apia le HMS Britannica ma Prince Phillip ma Lord Mountbatten o Peretania

1994 Solo tetee Tumua ma Pule i le VAGST

03

1934 Lau le iuga moliaga Taisi Nelesoni; 8 masina toese; 10 tausaga faaunuua

## Aulia 80 Tui Atua



**E** ATOA AI i le vaiaso leni le 80 tausaga o le soifua o Tui Atua Tupua Tamasese Efi. Pe faapea foi o Taisi Tufuga Tupuola o isi ona suafa e iloa ai e le atunuu.

Sa faipule, sa minisita sa palemia ae tauluga lana tautua malo i le avea ma Ao o le Malo o Samoa. A faitau mai i le aso (1965) na amata ai lana tautua o se faipule, e aulia le 2017 na mae'a ai lona tofiga o le Ao, e 51. E avea ai ia ma se tasi tautua aupito umi a le malo tuto'atasi o Samoa; i tulaga taiulu o le atunuu. E soifua Tui Atua a ua toe taliu i fanua le faatafea a lona tamā matua; 10 tausaga le faasalaga o Taisi Nelesoni e Luxford le faamasino; na soloia e Savage ma le malo fou a le Leipa ina ua pale i le 1935. Afua mai i lea taimi se liuliuga malie i upufai o le malo Samoa, aemaise i le va o le Mau ma le malo. Ina ua saili ni sui o le Fono i le tausaga sosoo ai, e 33 mai sui usufono e 39 o ni sui o le Mau. O le tausaga foi lea o lona soifua mai (1938) na tofia ai lona tua'a, Tupua Tamasese Meaole i le tofiga Fautua. Ona sagai tau lea o le lalolagi ma avatua ai le faamuamua i le saogalemu o le atunuu mai le fili. Pe a o le 6 tausaga o lona soifua na tuua ai le malo e lona tamā matua. I ana lauga ma upu faamau e molimau ai i le sao taua a ona tuua ma a latou tautua i lana sailiga malo. O le mau tuufaasolo, le taua o le gagana, lo tatou tofi fanua, o ni vaega ia o le molimau ia Tui Atua Efi; i le isi ona pulou e lauiloa ai; o se faia'oga i mataupu ua ta'ua, o loo ua fa'auau ai nei lana tautua.

## Fep-Mati i le Tala Faasolo o Niu Sila



29 Fep 2004. Maua e le ata NS faatagata e 11 Oscar mo le *The Return of the Kings*

02 Mati 1865. Faalava'au e Maori se misionare papalagi

03 Mati 1960. Lolomi le tusi *A good keen man* a Barry Grump

## NIUPAC PUBLICATION

Email: [evaleon.books@gmail.com](mailto:evaleon.books@gmail.com)  
Phone: (03) 382-6674  
Postal: 39 Basingstoke Street,  
Aranui, Christchurch 8061

All rights reserved. This bulletin and its content is protected by copyright laws of New Zealand and international conventions. Except for educational purposes, any other activity pertaining to its use is prohibited. OLA understands the rights of other copyright holders whose material we use and acknowledge always—apart from our own.

NIUPAC 2011

Editor:  
LPS Tavita, MPS, BTheol, BA, Grad Dip Tchg  
[ltavita8@gmail.com](mailto:ltavita8@gmail.com)  
Reporters:  
Saili Aukuso, MA, BEd, DipTESL, DipTchg  
[saili.niupac@gmail.com](mailto:saili.niupac@gmail.com)  
Fili Fuaava  
[ola.niupac@gmail.com](mailto:ola.niupac@gmail.com)

## EVALEON BOOKS & NIUPAC PUBLISHING


Telefoni (03) 382-6674. meliE: [evaleon.books@gmail.com](mailto:evaleon.books@gmail.com)



Sponsors:


Evaleon  
Books &  
Niupac  
Publishing

*Tautua e ala i le gaosia o alaga'oa mo a'oga (tusi mo le a'oa'oina o le faitau i le gagana Samoa, tusi e a'oa'o ai gagana, kalena, posters, yearbooks, brochures). E tautua fo'i i le fa'aliliuga o gagana, ma le tapenaina o ni tusi e fia lomai i so'o se sionara o fatuga.*



# TAALOGA PASO SAMOA ~ GAGANA E LUA ~ BILINGUAL CROSSWORDS

1. Faatumu le pusa i upu/igoa Samoa poo se tasi e faatonuina. Fill the grid with the Samoan equivalents or any other as directed.



LPSTavita 2018 Copyright

**ACROSS**


- 1. Look (8)
- 5. climb (2)
- 8. to fly (4)
- 9. familiar (6)
- 12. for (2)
- 13. custom (2)
- 15. know (4)
- 19. sick (3)
- 20. the (article) (2)
- 21. spoon (6)
- 25. sun (2)
- 26. chair (5)
- 27. people who speak Samoan (5)
- 30. flag (3)
- 31. shell (5)
- 32. first (5)

- 7. root (2)
- 9. true (3)
- 10. always (3)
- 11. letter sound number
- 10 Samoan alphabet (2)
- 14. tell (3)
- 16. ant (insect) (3)
- 17. scoop (3)
- 18. fire (3)
- 21. not allowed to (2)
- 22. flying fox (3)
- 23. only (3)
- 24. if (4)
- 25. hide (4)
- 27. a, any (3)
- 28. stuck (3)
- 29. blow (storm) (3)


**DOWN**

- 1. talking (11)
- 2. shake (4)
- 3. tea (2)
- 4. step (3)
- 6. dig (3)

Solution ~ Tali



2. a. Fill the grid with English words/names or any other as directed. b. Find the synonyms of as many words/ names in Samoan.



LPSTavita 2018 Copyright

**ACROSS**

- 1. 2nd day week (6)
- 4. make music (4)
- 8. a liquid dish (4)
- 9. A popular Swedish name for a boy (6)
- 11. a verb to be (2)
- 12. large birds NZ used to have (3)
- 14. a hard metal (4)
- 16. prefix. Take away (2)
- 17. enjoyment (3)
- 18. hearing organ (3)
- 20. refer to a thing (2)
- 21. no (plural) (4)
- 25. abbrev. Edward (2)
- 26. a churchman (6)
- 29. a young male horse (4)
- 31. find the phrase (5,3,3)

- refer to herself (2)
- 13. in the time following an event (5)
- 14. place to pay and stay for a while (3)
- 15. a solid material (3)
- 16. abbrev. Doctor (2)
- 19. Education provider at Christchurch (3)
- 22. a class of instruments in symphony (5)
- 23. a smooth fabric (5)
- 24. abbrev. First part of the Bible (2)
- 26. Text message 3 letters (someone calls after work, needs a lift) (3)
- 27. feeling down (3)
- 28. canoe paddle (3)
- 30. interjection (now I get it!) (2)

**DOWN**

- A plan fails (7)
- 2. word to name sth (4)
- 3. while (2)
- 5. between (5)
- 6. past participle of give (5)
- 7. expected time to happen (3)
- 10. therefore (2)
- 12. used by speaker to

Solution





# PASI ATU LA TATOU PULETINI I LE TOU A'OGA, AIGA, LOU TUAOI, AU UO, E AOGĀ MO LE FANAU A'OGA



Igoa: O. F. Nelson  
Aso Fanau: 24 Fepuari 1883  
Ausiga: lauiloa i le sailiga malo a Samoa mo le tuto'atasi  
Fetu: Pise

E iloa e Samoa i lona suafa matai o Taisi poo Taisi Nelesoni le faaSamoa o lona suafa sa lauiloa ai i a Niu Sila ma le lalolagi. Ua lava ma totoe faamau a le 'aufaamau e saili i ai se tala i lona soifua; atalii o se faioloa Europa, se faipisinisi manuia, se poutu o le mau i le sailiga a Samoa mo le faafoiina mai o lana pule ua faoa. O le isi vaega o le tala fai mai le upu ua faamauina lava. E iai le tusi Tautua na faato'a tatala atu nei, e maua i ai se oototoga manino o le faamau ia Taisi. O se tali lea o le faatali a le to'atele talu ona tumalo Nelesoni i le 1944. To'atele tupulaga i luma mai o le tuto'atasi e le silafia le suafa; atoa foi se silafia i le Mau lava ia; e oo mai nei a talanoa i le Mau e foliga e taula'i le vaai i le na o le taulaga a Tamasese. A o le Mau ma le sao o Taisi e saili lava i le afuaga le mamao ma le tuga o le tauiviga. E manino foi lea i tafa ta'itasi na momoli atu ai le tetee faasaga i le fili. Taisi i le va i fafo ma papalagi, isi taiulu o le Mau i totonu o le atunuu. Na tumalo Taisi i le 1944 ae maua se vaega o le tali i le 1945, ina ua liulualo mai le lalolagi, ma Niu Sila, e talanoa.

[www.ola888.com](http://www.ola888.com)

### ATI A'E UPU:

**Fatuaiga o Veape:** *faa-* i luma o se veape/nauna. I lenei fatuaiga ua mafai e le *faa* ona fai ni mea se lima: 1. faaveape se nauna (*faasuka, faaleo*). 2. galueaiina se veape (*faainu, faamau*). 3. e o ma le le agai e faailo se taofi taumate (*talanoa faale talanoa*). 4. e o ma le tau e faailo se tulaga feagai o ni mea se lua (*faataupupula, faatauata*). 5. o faatasi ma nisi veape i le fausaga lenei: lago—lagolago—faalagolago. **Mai le tusi Lau Amata Veape**

### Tulimanu o Pola:

# Aso Soifua ma mea taua



E muamua lava ona avatu la'u faamalo i Lana Afioga a le Tamaaiga, i le aulia o lona 80; e faafetaia le agalelei o lo tatou Tamā i le lagi i lana foa'i i le soifua. E faafetaia aiga ma uo ma Samoa o loo tapua'ia faiva o Lana Afioga. E fiafia foi e molimoli atu le faamanuia a alo ma fanau faitau a le OLA i lou Aso Soifua; faaopopo nisi aso se tele auā le tautuaina pea o Samoa o lo tatou tofi.

Ina ua tatala le tusi a Tui Atua, Ia faagaganaina oe e le Atua fetalai, e iai le toeaina sa maua lana kopi. Ina ua tilotilo e lei tau lona loto i mea o i le anotusi. Faapea lava ia o se tusi e a'o ai lauga faaSamoa. Ua maliu si toeaina, ma ona moomooga, ma lona lalolagi. Maumau e! Ana mafai foi ona ia Facebook mai i le la itu o le vai.

Tele lafoga i le tusi lea a Tui Atua e le taumate e totoma i ai tupulaga lalovaoa i ni aso. Ona o loo laei i le gagana Samoa ae sau aso e fai ni o latou peleue papa'e ma ni fusiua; ma saga faasusulu atu ai le mau faaSamoa. E ala i isi leo. Ou te manatua lava le solo a Fealualua'i, poo le Susuga ia Seiuli sa lauliliuina le anotusi. O Seiuli e lauiloa i lipoti o tala o le vai; tailo i le Twitter pe maua le toeaina lea. O se matai talenia tele.

Manaia le faasoa o le vaiaso, faamalo atu i le susuga ia Pauline. E moni, ua sui le taimi sui ai ma faiga; a o le fesili o loo laualuga i manatu; pe moni o loo tumau pea faavae? Talanoa i le alofa moni, na o tina e saili i ai le faamaoni o sea faavae; o masima latou o loo faaleleia le aano; ae 'aua e te sailia i se tulafale; auā e ese foi lana tilotilo.

E iai tama sesē foi na a talanoa i le alofa ae tilotilo mai pe fia se mea na e alu atu ma oe i le faalavelave. Pe alu e ave le sii aumai le faaalalo e le tusa ma mea na avatu ona tomumu lea. Atonu o le faaSamoa moni lea. E mulimuli mai misionare ma le alofa o Iesu e foa'i fua. Leai se tomumu pe a u mai le tua.

Ia, ua na o se manatu. A ia manuia lava le fanau, ma le mamalu o le aufaitau.

## POLE MA PAPA

